

Furriadura in sardu de su contu intitulau “**NINA PORCU**”, càpiu in is pàginas corantanoi e cinquanta (pp. 49-50) de liburu scrittu de MARCO PLACENTINO e intitulau “*Soleminis: racconti di guerra. La vita durante il Secondo Conflitto Mondiale*”, Dolianova, Grafica del Parteolla 2010.

‘NINNA PORCU’

*“... innantis de tupai su baullu anca iant postu a su pipiu Gesuinu,
iant imbaullau fintzas sa camba de su fradi Otàviu ...”*

Tistimoniàntzia de Ninna Porcu

Su bintunu de su Mesi de Ladàmini de s’annu Duamilla-e-noi (21/10/2009).

Mi nant Ninna Porcu e seu nàscia su binticuàturu de su Mesi de Làmpadas de su Milli-e-noixentus trintadus (24/06/1932). Mi-ndi arregordu diaici beni de su tempus de sa gherra. Femu piciochedda. In domu d-unu bixinu nostu, Luisu Àngius, iant ospitau a unus cantu sfollaus. Intra issus, ddui fiant fintzas duus fradixeddus. A su prus piticheddu ddi narànt Gesuinu e a su fradi prus matucheddu Otàviu, unu de trexi annus e s’àteru de cuìndixi.

Una dii, in bidda, si-nci fiat spainada sa boxi d-una cosa lègia chi ddus fiat capitaus. Sa gherra fiat giai acabada de pagu e is duus fradixeddus fiant andendi, comenti costumànt a fai dònna dii, a traballai sa terra. Apustis de èssiri passaus in mesu de su sartu de Solèminis, cun su carretoni insoru tirau de unu cuaddu fiant arribaus a sa bingia. Ndi fiant calaus de su carretoni, impunnendi a is fundus de sa bingia po anca cumentzai su traballu insoru. Eperu, asuta de terra, ddui fiat una bomba chi, a s’ora sua, no iat scopiau. Apenas dda iant posta pei, sa bomba fiat partia in àiri bocendi, in cussu momentu etotu, Gesuinu. Otàviu, invècias, si fiat sarvau, perou iat pèrdiu una camba. Mi fiat abarrau in conca unu arregordu chi mi iat spantau meda: innantis de tupai su baullu anca iant postu a su pipiu Gesuinu, iant imbaullau fintzas sa camba de su fradi Otàviu.

Mi-ndi arregordu de una àtera cosa. Una dii, una bixina de acanta de domu, Clèlia Porceddu, fiat abetendi chi sa sorri Annita, chi biviata a Pirri, arribessit a domu sua. Apustis de ddui èssiri arribada, iant intèndiu is sirenas sonai. Currendi fiant aproillaus a domu nosta, ca babai, cun s’agiudu de is fradixeddus mius, iat fatu unu fossu apalas de sa funtana. Nosu pipius ddu pigamus a prexù, ca candu giogamus a cua a cua, cussu arrefùgiu fiat su logu anca si praxiat de prus a si cuai. Perou po tzia Annita fiat traballosa meda ca, sendi issa mannàcia e strintu su logu, fiat turmentu mannu diaderus a

nci intrai in s'arrefùgiu. Su barrancu mannu, perou, si-nci fiat amostau a parti de agoa, a perìgulu giai passau. Tzia Annita fiat abarrada arrèscia e nci fiat bòfiu s'agiudu de totu su bixinau po dda agiudai a ndi dda bogai aforas!